

An et ass och an deem Kontext, wou sech d'Agence fir d'Promotioun vun der Ekonomie mat engem besonnesche Bléck och op d'Finanzplaz wäert entwéckelen. Ech weisen do zréck op dat, wat ech de Moie gesot hunn. Doriwwer wäerte mer och selbstverständlech an der Chamber an deenen nächste Méint nach interessant an intensiv Diskussiounen kréien.

De Moment, wéi gesot, sinn ech frou, datt mer dëse Projet konnten zäitgerecht stëmmen. E schafft eis Rou op der Finanzplaz, well elo hu mer bis 2010 Kloerheet fir dëst wichtegt Instrument.

Merci.

» **M. le Président.** - Merci, Här Minister. Mir kommen dann zur Ofstëmmung iwwert dëse Projet.

Vote sur l'ensemble du projet de loi et dispense du second vote constitutionnel

De Projet de loi 5624 ass mat 60 Jo-Stëmmen ugehall.

Ont voté oui: Mmes Sylvie Andrich-Duval, Nancy Arendt, M. Lucien Clement, Mmes Christine Doerner, Marie-Josée Frank, Marie-Thérèse Gantenbein-Koullen, MM. Marcel Glesener, Norbert Hauptert, Mme Françoise Hetto-Gaasch, MM. Ali Kaes, François Maroldt, Paul-Henri Meyers, Laurent Mosar, Marcel Oberweis, Patrick Santer, Marcel Sauber, Jean-Paul Schaaf, Marco Schank, Marc Spautz, Mme Martine Stein-Mergen (par Mme Nancy Arendt), MM. Fred Sunnen (par M. Marc Spautz), Lucien Thiel, Lucien Weiler et Michel Wolter;

MM. Marc Angel, Alex Bodry (par Mme Claudia Dall'Agnol), John Castegnaro, Mme Claudia Dall'Agnol, M. Fernand Diederich, Mme Lydie Err, MM. Ben Fayot, Jean-Pierre Klein (par M. Marc Angel), Mme Lydia Mutsch, MM. Roger Negri, Jos Scheuer, Romain Schneider, Roland Schreiner et Mme Vera Spautz;

M. Xavier Bettel, Mme Anne Brasseur, M. Emile Calmes, Mme Colette Flesch (par M. Xavier Bettel), MM. Charles Goerens, Henri Grethen, Paul Helminger (par M. Emile Calmes), Alexandre Krieps (par M. Henri Grethen), Claude Meisch et Carlo Wagner;

MM. Claude Adam, François Bausch (par M. Camille Gira), Félix Braz, Camille Gira, Jean Huss (par M. Claude Adam), Henri Kox et Mme Viviane Loschetter (par M. Félix Braz);

MM. Gast Gibéryen, Jacques-Yves Henckes, Jean-Pierre Koepp et Robert Mehlen;

M. Aly Jaerling.

Gëtt d'Chamber d'Dispens vum zweete Vote constitutionnel?

(Assentiment)

Dann ass et esou decidéiert.

Mir kommen elo zum Projet de loi 5610 iwwert d'lëtzebuergesch Bedeelegung an der Association Internationale de Développement an dem Fonds International de Développement Agricole. Den Här Hauptert ass Rapporteur. Här Hauptert!

3. 5610 - Projet de loi relative à la participation du Grand-Duché de Luxembourg

- à l'initiative d'allègement de la dette multilatérale de l'Association Internationale de Développement et

- à la septième reconstitution des ressources du Fonds International de Développement Agricole

Rapport de la Commission des Finances et du Budget

» **M. Norbert Hauptert (CSV), rapporteur.** - Här President, Dir Dammen an Dir Hären, de Projet 5610 behandelt engersäits d'Bedeelegung vun eisem Land un der Annulatioun vun de Scholde vun deenen aarmen a staark verschëllte Länner an déi

International Entwécklungsassociatioun, an anerersäits d'Bedeelegung vu Lëtzebuerg un der siwenter Rekonstitioun vum Kapital vum Internationalen Agrarentwécklungsfong.

Wat d'Annulatioun vun de Créancë vun deenen aarmen a staark verschëllte Länner un international Entwécklungsassociatiounen ubelaangt, sou berout dës op enger Initiativ, déi um G8 zu Gleneagles d'lescht Joer geholl gouf. Initiativ, déi sech «Initiative d'allègement de la dette multilatérale» nennt an déi dora besteet, fir deene ganz aarmen a staark verschëllte Länner hir Scholdlaascht géintiwwer den internationalen a multinationalen Institutiounen, dat heescht dem Internationale Währungsfong, dem FMI, der Weltbank an dem afrikaneschen Entwécklungsfong ze annulléieren an hinnen doduerch méi Mëttelen ze ginn, fir hir Entwécklung méi schnell weiterzeféieren an doduerch d'Objektiver vum Millénaire fir d'Entwécklung, dat heescht bis 2015 d'Aarmut an der Welt ëm d'Halschent erfzesetzen, ze erreechen.

Dës Initiativ kascht ëm déi 50 Milliarden Dollar. Well den FMI awer seng Annulatioun vun de Créancen iwwer eege Mëttel finanzéiert a Lëtzebuerg net Member vun dem afrikaneschen Entwécklungsfong ass, limitéiert d'Lëtzebuurger Participatioun sech op d'Annulatioun vun de Créancë vun dem Internationalen Entwécklungsfong.

Well déi international Instanzen hir Hëllef gréisstendeels iwwert de Fonds de roulement vun dem Remboursement vun de Créancen, dat heescht iwwer Annuitéiten, déi zréckbezuelt ginn, finanzéieren, brauche se déi fir nei Prëten deenen aarme Länner ze accordéieren. Duerch déi Annulatioun vun de Créancë géif kee Remboursement geschéien, an domadder hätten déi international Instanzen also keng Mëttelen, fir nei Prëten ze accordéieren, sou datt d'Entwécklungshëllef domadder net kéint weidergefouert ginn. Duerfir huet déi International Entwécklungsassociatioun och e Finanzéierungsplang missen opstellen, fir d'Refinanzéierungsmëttelen vum dem Fong fir déi nächst Joren ze garantéieren. Deen Entwécklungs- oder dee Refinanzéierungsplang, deen erstreckt sech bis d'Joer 2043. D'Participatioun vu Lëtzebuerg un deem Plang beleeft sech op ongeféier 30 Millioune Euro, Participatioun, déi iwwert dëse Projet autoriséiert soll ginn.

Wat eis Bedeelegung un der siwenter Rekonstitioun vum Kapital vum Internationalen Agrarentwécklungsfong ubelaangt, esou gëtt déi mat 650.000 Euro festgehalen. Wéinst den Donen an de bëllege Prëten, déi de Fong fir seng Programmer accordéiert, mussen d'Engagementer vun de Memberstate vun deem Fong regelméisseg aktualiséiert ginn. Dëse Projet autoriséiert d'Regierung, sech un där siwenter Rekonstitioun vum Kapital vun dësem Fong ze participéieren. De Statsrot huet e favorablen Avis zum Projet ofginn. D'Kommissioun huet mäi Rapport unanime an hirer Sitzung vum 7. Dezember ugehall a schléit der Chamber vir, de Projet, esou wéi en hei virläit, ze stëmmen, an ech bréngen och domat den Accord vun eiser Fraktioun.

» **M. le Président.** - Ech gesinn, dass d'Fraktiounen alleguerten an och d'Regierung mat den Ausféierunge vum...

(Interruption)

Ah, den Här Goerens huet nach d'Wuert.

Discussion générale

» **M. Charles Goerens (DP).** - Här President, Dir Dammen an Dir Hären, bei dësem Projet muss ee sech Méi gi fir Argumenter ze fannen, fir derfir ze stëmmen. Ech soen dat, obschonn dat elo ganz brutal bei engem Projet kléngt, deen à première vue schéngt konsensfäeg ze sinn, well wien ass scho géint d'Annulatioun vun der Dette vun deenen Äermste vun deenen Aarmen?!

Ech soen och direkt, datt mir zwar zoustëmmen, mä ech mellen awer e puer ganz zollid Reserven un, an ech ginn ee Grond, deen eis am Fong dozou beweegt, fir dësem Projet eis Zoustëmmung ze ginn.

Ech fänken emol u mat de Reserven. Hei geet et am Fong drëm, fir ronn 50 Milliarden Dollar deenen äermste Länner nozeloossen. Déi Schold, déi do entstanen ass an déi net konnt zréckbezuelt ginn, déi wier warscheinlech och zum gréissten Deel ni méi zréckbezuelt ginn, esou datt et am Fong e fiktive Soulagement ass vun deene sou genannte Pays les moins avancés.

Zweetens, dee Problem hei ass och e bësse Famill mat der Kris am Irak. Et muss ee wëssen, dass de President vun der Weltbank momentan den Här Wolfowitz ass, dee fréier zu Washington am Pentagon zu den Hardliner gehéiert huet, an dee sech och ganz staark gemaach huet, fir dem Irak d'Scholden nozeloossen.

Et kann ee sech also net virstellen, datt deen eng Politik hätt kënne maachen, wou nëmme just den Irak seng Dette annulléiert kritt hätt an net déi Äermst vun deenen Aarmen, well den Irak huet ëmmerhi jo awer eng Partie Ressources naturelles, déi e missten habilitéieren, progressiv kënne säin eegene Wuelstand, seng eege Subsistance ze finanzéieren.

Drëttens, déi Scholden, déi net konnten zréckbezuelt ginn, sinn och en Echec vum Consensus de Washington, deen am Fong virgesinn huet, datt d'Länner sech misste finanziell gesond schrumpfen, wat ugaangen ass bei der Gesondschrumpfung vun de Statsfinanzen, wat a sech kee répréhensibel Zil ass, mä wat awer, wann een et isoléiert gesäit a wann et vu soss kenger Moosnam begleet gëtt, awer de Länner hir Problemer éischter vergréissert wéi se verklengert.

Eng ganz Partie Länner hunn opgrond vun deem Scholdendrock ugefaangen, en Deel zréckbezuelen, an déi Suen, déi se natierlech op d'Dette hu misse bezuelen am Ufank, déi awer net duergaange sinn, fir se ganz ze remboursséieren, déi hunn natierlech gefeelt fir d'Secteurs sociaux de base ze développéieren: den Accès un d'Soins de santé de base zum Beispill, zweetens d'Education, alles Rubriken, déi mer haut an den Objectifs du Millénaire pour le développement fannen, déi warscheinlech och bis 2015 - wat d'Deadline ass fir d'Erfëllung vun deeneselwechten - net kënnen erreecht ginn. Et geet am Fong do, wéi de Rapporteur et gesot huet, ëm d'Reduktioun vun der Aarmut ëm d'Halschent.

Dat Véiert: E Land wéi Lëtzebuerg ass net mat responsabel fir dee Problem. Mir mussen eis awer un der Refinanzéierung vun der Weltbank hire Prëten, déi se net konnt remboursséieren, mat bedeelegen.

Dat ass a sech ongerecht, well déi, déi am Fong eng richtig Entwécklungspolitik gemaach hunn, déi op Donë baséiert war an net op Prëten, déi mussen also mat elo d'Fraisé bezuele vun deenen, déi responsabel si fir den Echec. Op déi Manéier steet d'Lëtzebuurger Entwécklungshëllef am Fong irréprochabel do.

Elo gëtt et een eenzege Grond, deen eis dozou beweegt, fir eis Zoustëmmung zu dësem Projet ze ginn. Dat ass deen, datt déi Länner, déi vun deem Allègement, vun där Annulatioun vun där Dette hei betraff sinn, datt deenen hir Bevëlkerung ni an der Lag war, jee ee Su vum Gros vun deene Prëten, déi gemaach goufen, fir hir eegen Entwécklung ermëzgesinn. Ganz viles ass an donkele Kanäl verschwonnen a ganz vill Gelder sinn duerch korrupt Regimer déviéiert ginn.

Duerfir mengen ech, an esou enger Phas ass et méi richtig, et hëlt ee Précautiounen an et sécuriséiert een d'Programmer an d'Projets de développement, wéi datt een einfach ouni Précautioun d'Geld iwwer eng sou genannten Aide budétaire deene Länner zur Verfügung stellt.

A wa mer also eis Zoustëmmung ginn, dann ass et, well mer net wëllen nokucken, datt viru Leit, déi ni eppes haten dovun, déi ni e Su gesinn hu vun deene Gelder, datt déi elo och nach misste fir déi nächst 20 oder 30 Joer déi Prêté remboursséieren.

» **Une voix.** - Très bien.

» **M. Charles Goerens (DP).** - An dat Lescht, wat ech wëll soen, dat hänkt mat der Problematik Cap-Vert zesummen. De Cap-Vert huet eng speziell Situatioun. De Cap-Vert ass eent vun deene ganz wéinege Länner, déi nach bis viru kuerzem zu de Pays les moins avancés gezielt hunn, an déi hir Scholden zu engem Deel ëmmerhin zréckbezuelt hunn. Déi profitéieren heivunner net.

Et qui plus est...

» **M. le Président.** - Här Goerens, därfer ech lech soen, dass Dir elo Är Zäit ëm dat Duebelt iwwerschratt hutt?

» **M. Charles Goerens (DP).** - Här President, gutt, wann Dir insistéiert, ech kann och direkt ophalen, soss maachen ech nach mäi Saz fäerdeg.

Ech wollt nëmme just soen, et ass ongerecht vis-à-vis vun engem Land wéi dem Cap-Vert, wat enorm Efforté gemaach huet, net nëmme fir seng Scholden zréckbezuelen, mä fir och nach seng Situatioun ze verbessern.

Do geet ee Bailleur de fonds nom anere fort, an ech fannen, datt mir als Lëtzebuurger do eng Responsabilitéit hunn an dem Cap-Vert sollen hëlfen, datt en net vun der internationaler Communautéit, vun de multilateralen Agencen an och vun deenen eenzelne

Bailleurs de fonds abandonnéiert gëtt. Dat wier net gerecht, dat wier e ganz trauregen Nieweneffekt vun dëser Démarche.

Ech soen lech Merci.

» **Plusieurs voix.** - Très bien!

» **M. le Président.** - Merci, Här Goerens. Wa soss näischt méi bäizeflécken ass, da kënne mer zur Ofstëmmung vun dësem Projet de loi kommen.

Vote sur l'ensemble du projet de loi et dispense du second vote constitutionnel

De Projet de loi 5610 ass eestëmmeg ugehall mat 60 Jo-Stëmmen.

Ont voté oui: Mmes Sylvie Andrich-Duval, Nancy Arendt, M. Lucien Clement, Mmes Christine Doerner, Marie-Josée Frank, Marie-Thérèse Gantenbein-Koullen, MM. Marcel Glesener, Norbert Hauptert, Mme Françoise Hetto-Gaasch, MM. Ali Kaes, François Maroldt, Paul-Henri Meyers, Laurent Mosar, Marcel Oberweis, Patrick Santer, Marcel Sauber, Jean-Paul Schaaf, Marco Schank, Marc Spautz, Mme Martine Stein-Mergen (par M. Marcel Oberweis), MM. Fred Sunnen (par M. Marc Spautz), Lucien Thiel, Lucien Weiler et Michel Wolter;

MM. Marc Angel, Alex Bodry (par Mme Claudia Dall'Agnol), John Castegnaro, Mme Claudia Dall'Agnol, M. Fernand Diederich, Mme Lydie Err, MM. Ben Fayot, Jean-Pierre Klein (par M. Ben Fayot), Mme Lydia Mutsch, MM. Roger Negri, Jos Scheuer, Romain Schneider, Roland Schreiner et Mme Vera Spautz;

M. Xavier Bettel, Mme Anne Brasseur, M. Emile Calmes, Mme Colette Flesch (par M. Xavier Bettel), MM. Charles Goerens, Henri Grethen, Paul Helminger (par Mme Anne Brasseur), Alexandre Krieps (par M. Claude Meisch), Claude Meisch et Carlo Wagner;

MM. Claude Adam, François Bausch (par M. Félix Braz), Félix Braz, Camille Gira, Jean Huss (par M. Camille Gira), Henri Kox et Mme Viviane Loschetter (par M. Henri Kox);

MM. Gast Gibéryen, Jacques-Yves Henckes, Jean-Pierre Koepp et Robert Mehlen;

M. Aly Jaerling.

Gëtt d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

Mir kommen elo zum leschte Punkt vun eisem Ordre du jour vun haut. Dat ass de Projet de loi 5626. Rapporteur ass den honorabelen Här Marc Spautz.

4. 5626 - Projet de loi portant rectification du Code du travail

Rapport de la Commission du Travail et de l'Emploi

» **M. Marc Spautz (CSV), rapporteur.** - Här President, léif Kolleeginnen a Kollegen, dee Projet, deen elo virläit, ass am Fong eng Rectificatioun vum Code du travail. Dir kënt lech nach erënnere, mir hu viru véier Méint de Code du travail gestëmmt a mir hate gesot, dass et méiglech wier, dass eis eng oder aner Erreur matérielle do mat duergaange wier.

Hei wieren elo dräi Artikelen, déi mer géifen änneren. D'Regierung huet de 26. Oktober de Projet déposéiert. De 14. November ass den Avis komm vum Conseil d'État, an de 5. Dezember huet d'Kommissioun mech zum Rapporteur bestëmmt. Mir hunn och dono direkt den Avis vum Conseil d'État analyséiert. Do ass et awer och esou, dass de Conseil d'État nach eng Kéier drun erënnert, dass just eng Rectificatioun géif gemaach ginn an net méi.

Ech weess och, dass elo verschidde Beruffschamberen nach schreiwe vun Amélioratiounen, mä dat ass net de Sënn, well dee Projet hei soll wierklech just eng Rectificatioun sinn, well eis do e Feeler ënnerlaf war, wou mer zwee Numéroë matenee verwiesselt haten, dat ass richtgebéit ginn: Eng Kéier hu mer eis op d'Gesetz vun 1972 beruff amplaz vun 2004. Dat beweist awer, wéi wichtig et war, e Code du travail ze kréien, well dat soss duerch verschidde Gesetzer verstoppt ass. Ech mengen, méi ass net dozou ze soen.

Ech wollt och soen, ech ginn och gläichzäiteg am Numm vun der CSV-Fraktioun d'Zoustëmmung.

Ech soen lech Merci.

» **Plusieurs voix.** - Très bien!

» **M. le Président.**- Ech sinn iwwerzeegt, dass alleguerten d'Fraktiounen zoustëmmen an och d'Regierung. Duerfir komme mer direkt zum Vote vun dësem Projet de loi.

Vote sur l'ensemble du projet de loi et dispense du second vote constitutionnel

De Projet de loi 5626 ass eestëmmeg ugeholl mat 60 Jo-Stëmmen.

Ont voté oui: Mmes Sylvie Andrich-Duval, Nancy Arendt, M. Lucien Clement, Mmes Christine Doerner, Marie-Josée Frank, Marie-Thérèse Gantenbein-Koullen, MM. Marcel Glesener, Norbert Hauptert, Mme

Françoise Hetto-Gaasch, MM. Ali Kaes, François Maroldt, Paul-Henri Meyers, Laurent Mosar, Marcel Oberweis, Patrick Santer, Marcel Sauber, Jean-Paul Schaaf, Marco Schank, Marc Spautz, Mme Martine Stein-Mergen (par Mme Nancy Arendt), MM. Fred Sunnen (par M. Marc Spautz), Lucien Thiel, Lucien Weiler et Michel Wolter;

MM. Marc Angel, Alex Bodry (par Mme Claudia Dall'Agnol), John Castegnaro, Mme Claudia Dall'Agnol, M. Fernand Diederich, Mme Lydie Err (par M. Roland Schreiner), MM. Ben Fayot, Jean-Pierre Klein, Mme Lydia Mutsch, MM. Roger Negri, Jos Scheuer, Romain Schneider, Roland Schreiner et Mme Vera Spautz;

M. Xavier Bettel, Mme Anne Brasseur, M. Emile Calmes, Mme Colette Flesch (par M. Xavier Bettel), MM. Charles Goerens, Henri Grethen, Paul Helminger (par M. Henri Grethen), Alexandre Krieps (par M. Claude Meisch), Claude Meisch et Carlo Wagner; MM. Claude Adam, François Bausch (par M. Félix Braz), Félix Braz, Camille Gira, Jean Huss (par M. Henri Kox), Henri Kox et Mme Viviane Loschetter; MM. Gast Gibéryen, Jacques-Yves Henckes, Jean-Pierre Koepp et Robert Mehlen; M. Aly Jaerling. Gëtt d'Chamber d'Dispens vum zweete Vote constitutionnel?

Mercredi,
13 décembre 2006

(Assentiment)

Et ass also esou decidéiert.

Voilà, domat si mer um Enn vun der Sitzung. D'nächst Sitzung ass muer de Mëtteg um hallwer dräi.

D'Sitzung ass opgehuewen.

(Fin de la séance publique à 17.12 heures)

SÉANCE 14

Présidence: **M. Lucien Weiler, Président**
M. Jos Scheuer, Vice-Président • M. Henri Grethen, Vice-Président

Ordre du jour

1. Motion de Mme Anne Brasseur relative aux réformes du cycle inférieur de l'enseignement postprimaire
(Discussion générale - Vote)
2. Résolution de M. Charles Goerens relative à la condamnation de la contestation de la Shoah
(Vote)
3. Débat d'orientation demandé par le groupe DÉI GRÉNG au sujet de la politique énergétique du Luxembourg
(Débat - Motions - Votes)

Au banc du Gouvernement se trouvent: Mme Mady Delvaux-Stehres et M. Jeannot Krecké, Ministres.

(Début de la séance publique à 14.32 heures)

» **M. le Président.**- D'Sitzung ass op. Huet d'Regierung eng Kommunikatioun ze maachen?

» **Mme Mady Delvaux-Stehres, Ministre de l'Éducation nationale et de la Formation professionnelle.**- Mir hu keng Kommunikatioun, Här President.

» **M. le Président.**- Keng Kommunikatioun.

Als éischte Punkt haut de Mëtteg op eisem Ordre du jour befaasse mer eis mat der Motioun, déi d'Madame Anne Brasseur den 21. November déposéiert huet, iwwert d'Reformen am Schoulsecteur. D'Fraktiounen hu fënnf Minutten Zäit, d'ADR zwouanenghallef Minutt an den Här Jaerling och zwouanenghallef Minutt. D'Madame Brasseur, als Auteur vun der Motioun, huet elo d'Wuert.



1. Motion de Mme Anne Brasseur relative aux réformes du cycle inférieur de l'enseignement postprimaire

» **Mme Anne Brasseur (DP), auteur.**- Merci, Här President, Dir Dammen an Dir Hären, ech hat déi Motioun hei am Numm vun der DP-Fraktioun eraginn an do huet d'Majoritéit an dëser Chamber decidéiert, e Renvoi an d'Commission de l'Éducation nationale ze maachen. An enger Sëtzung hu mer och déi Motioun diskutéiert an et ass do ganz kloer zum Virschäi komm, dass déi aner Fraktiounen dës Motioun net géife matdroen, an dass d'Madame Minister och gesot huet, d'Motioun wär fir si inakzeptabel.

Ech wëll awer hei op dëser Plaz nach eng Käier soen, dass ons de Contenu vun dëser Motioun immens um Häerz läit. Mir hunn an onsem Schoulwiesen zurzäit eng Partie Reformen, déi awer zu Onsécherheete féieren am concernéierte Milieu, déi zu Oprouer féieren, an dat ass net gutt fir onse Schoulsystem. D'Schoul brauch nämlech Serenitéit, fir ze funktionnéieren.

Mir hate Projete wéi dee vun de Critères de promotion, déi geännert gi sinn. Du si se erëm geännert ginn a mir sinn einfach der Meenung, dass ze vill Changementer, dat Hin an Hier, fir d'Schoul net gutt ass.

Esou war annoncéiert ginn, dass op Septième d'Coursé vum Englesche sollen age-

féiert ginn. Dofir kann ee sech froen opgrond vu wat, op Käschte vu wellechem anere Fach dat géif goen. Ob et net déi Kanner, déi Schwieregkeeten hunn, défavoriséiert, well de Passage vum 6. Schouljoer op Septième jo extra schwéier ass.

Da stelle mer ons och Froen iwwert de Cycle d'apprentissage am Secondaire technique, dass déi zwee éischt Jore sollen zesummegeschloe ginn an dass een an deem Cycle net soll kënne duerchfalen, ob dat wierklech de richtege Wee ass.

D'Sprooche sollen och anescht evaluéiert ginn. Dee ganze System soll op d'Compétences linguistiques opgebaut ginn. Och do froe mer ons wéi dat funktionnéiere soll.

Mir stellen ons d'Fro: Wat geschitt mat deene Schüler, déi dann déi Socles de compétences net errechen?

Et ginn zurzäit an enger ganzer Partie Schoulen eng ganz Rei vu Projets pilotes iwwer ähnlech Thematiken, an dofir hätte mir gären, dass déi Projets pilotes evaluéiert ginn; dass no der Evaluatioun Konklusione gezu ginn; dass déi Konklusioune diskutéiert ginn a wann dat da positiv ass, dass dat mat de Concernéierten dann ëmgasat gëtt, fir dass mer esou onse Schoulsystem reforméiere kënnen.

D'Schoul brauch Reformen. D'Schoul brauch Adaptatiounen. Do ass jiddfree sech eens. Mä déi Adaptatioun muss een zesumme mat de Leit maachen, soss wierkt dat sech nämlech géint de Schoulsystem aus an et wierkt sech virun allem géint d'Kanner aus.

Dofir hu mer gefrot, dass all déi Projeten, déi elo ugeduecht sinn, emol op Äis geluecht ginn, fir dann an aller Serenitéit driwwer diskutéieren ze kënnen, fir Neel mat Käpp ze maachen, an dat am Intérêt vun onsem Schoulsystem.

D'Madame Minister huet gemengt, si géif ons Motioun iwwerhaapt net kënne verstoen a si ass op eng Rei Punkten agaangen an der Kommissioun, wéi zum Beispill, dass d'Englesch elo net op Septième ageféiert gëtt. Dann huelen ech Akt dovun. Dann ass dat jo schonn e Projet, deen op Äis geluecht ass.

Ähnlech ass et mat anere Projeten, mä vu dass d'Majoritéit net bereet ass dës Motioun ze akzeptéieren, mengen ech, huet et och keen Zweck, dass ech deen een oder anere Punkt vun der Motioun géif ofänneren.

An zum Schluss nach ee Wuert: Wann d'DP dat hei fuerdert, gesinn ech, dass mer net eleng sti mat onse Fuerderungen, mä dass et eng ganz Partie Leit gëtt, déi ons Meenung deelen. Mä dat Wichtigst ass, dass ech iwwerzeegt si vun deem, wat ech hei virdroen.

Ech soen lech villmools Merci.

» **M. le Président.**- Merci, Madame Brasseur. D'Wuert huet elo den honorabelen Här Maroldt.

(Discussion générale)

» **M. François Maroldt (CSV).**- Här President, Dir Dammen an Dir Hären, op eis Propos hin ass der Madame Brasseur hir Motioun an d'Educatiounskommissioun verwise ginn. Mir wollten der fréierer Educationsinministesch einfach d'Geleeënheet ginn, hir Iwwerleeungen am Detail ze développéieren. Si huet dës Geleeënheet allerdéngs verpasst an eis net iwwerzeegt.

Positiv ass, dass d'Madame Minister Delvaux d'Geleeënheet hat zu dëser Motioun Ried an Äntwert ze stoen. Leider awer huet d'Madame Brasseur weiderhin un hirer Motioun festgehalen a mir hu gesinn an héieren, dat et sech bei dëser Initiativ net ëm en neien Input an d'Diskussioun géif handeln, mä et am Fong just géif drëms goen déi aktuell Bildungsreform vun der Madame Delvaux ze stoppen.

Dat, wat mer an der Kommissioun héieren hunn, war, dass Saachen net sollte gemaach ginn. Wéi eng Saache sollte gemaach ginn a wéi eng Saachen aneschtens sollten ugepak ginn, dat huet d'Madame Brasseur net gesot.

Datt iwwert der Schoul hir Ausriichtung, hir Inhalter an hir Reform kann a soll, souguer muss an engem permanente Prozess diskutéiert ginn, dat ass kloer. Datt awer esou e Prozess op eemol einfach esou soll gestoppt ginn, ass keng Optioun.

Kee Mënsch contestéiert der Madame Brasseur hiert Recht stänneg an der educationspolitescher Debatt present ze bleiwen, virun allem mat Alternativen, Ureegungen, Propositionen a Prioritéiten, wéi si se gesäit.

Wa mer also eppes presentéiert kréien, dann diskutéiere mer zesummen driwwer. Dës Motioun, déi just eppes verhënnere wëllt ouni eppes aneschtens ze proposéieren, lehne mir allerdéngs of.

» **M. le Président.**- Merci, Här Maroldt. Als Verrieder vun der LSAP-Fraktioun huet den Här Jos Scheuer d'Wuert.

» **M. Jos Scheuer (LSAP).**- Dir verstitt, dass den Här Maroldt mir aus dem Häerz geschwat huet, als President vun der Kommissioun.

(Hilarité)

Mir hunn an där Kommissioun der Madame Brasseur hir Motioun diskutéiert. Mir hunn alles diskutéiert, wat an de Considéranten opgezielt war. Mir hunn alleguerter fonnt, mat Ausnahm vun der Madame Brasseur, dass den Dispositif awer net tragbar wär.

Een, dee fir de Stëllstand um Niveau vun der Reforme plädéiert, dee plädéiert fir eng Stagnatioun matzen am Schoulsecteur, mat deem awer kee Mënsch méi zu Lëtzebuerg esou d'accord ass.

An d'Madame Minister huet virun allem zwou Saache kloergemaach.

Fir d'éischt: Et gëtt keng Reform, déi net duerchdiskutéiert ass mat de concernéierte

Milieuen, ob dat d'Professere sinn oder d'Schoulmeeschteren oder alleguerten déi Kräften, déi sech mat der Schoul befaassen. Dat ass dat Éischt, well et gëtt kee Cavalier seul vum Ministère.

Dat Zweet: Wann déi theoretesch Projeten an d'Praxis ëmgasat ginn, da mussen se a kënnen se nëmmen aus der Praxis eraus evaluéiert ginn. Et geet keng Evaluatioun, déi um theoreteschen Niveau stoe bleiwe kann. Och do ass hir Bereetschaft do fir déi Evaluatioun vun der Praxis aus ze maachen.

Dofir war ech och frou, wéi all d'Verrieder vun den eenzelne Fraktiounen gesot hunn, dass se opgrond vum Dispositif vun dëser Motioun se géifen oflehnen.

Merci.

» **Plusieurs voix.**- Très bien.

» **M. le Président.**- Merci, Här Scheuer. Fir d'Fraktioun vun deene Gréngen huet d'Wuert den Här Claude Adam.

» **M. Claude Adam (DÉI GRÉNG).**- Merci, Här President, Dir Dammen an Dir Hären, ech stelle mat Freed a Satisfaktioun fest, dass déi Gréng méi séier gemierkt hunn a wéi eng Richtung, dass d'Motioun vun der DP géif goen,...

(Hilarité)

... a mir ware jo och direkt bereet fir se ofzelehnen.

» **M. Jos Scheuer (LSAP).**- Här Adam, Dir iwwerschätzt lech awer!

(Hilarité et interruption)

» **M. Claude Adam (DÉI GRÉNG).**- Dat musst Der eis dann nach beweisen!

Här President, Dir Dammen an Dir Hären: Jo, mir wëllen alleguerten eise Schoulsystem verbesseren. An dann ass et awer schonns eriwuer mat de Gemeinsamkeeten!

Déi Gréng sinn der Meenung, dass een net d'Schoul reforméieren an awer alles beim Ale loosse kann. Mir sinn iwwerzeegt dervun, dass eist Bildungswiese reforméiert gi muss, fir dass eis Kanner an Zukunft net den zweete Präis kréien.

Wann een awer reforméiere wëllt, da muss ee sech kloer Ziler setzen, seng Ziler mat deene Betreffenen diskutéieren, e Fahrplang opstellen, deen och novollzéibar ass, zum Beispill andeems een an deenen ënneschte Klasse mat de Reformen ufänkt, an net ëmgedrënt; sech verséichert, dass säi Koalitionspartner matspillt, an da schéi systematesch reforméiert. Dat geschitt awer leider net esou. D'Messages aus dem Ministère sinn oft widdersprénglech. D'Konsequenze si bekannt: D'Schüler an d'Eltere gi veronséichert, d'Enseignanté sinn net zefridden; dat ass jo och net esou einfach. D'Reforme ginn ugeschwat, awer net am Fong diskutéiert.

Duerfir ass déi Motioun vun der Demokratescher Partei fir eis och schwéier verständlech. D'Reforme sollen op Äis geluecht ginn. D'Äis gesi mer a spiere mer och, mä wou sinn d'Reformen, déi mer sollen op Äis leeën? Elo, wou mer esou lues endlech eng Schouldebatt kréien, op déi mer schonns esou laang waarden, solle mer ophalen ze debattéieren, well méi wéi debattéieren ass jo bis elo nach net geschitt.